

Kayëte soŋe vë-ebëre Wade yehëhna hnë inji kayëte

Inji kayëte wasëwif vële hwëtahnëka Yesu Këris herëhnik. Ale herëk a yëtina, bare njëtëk ðus Vikerëh va kabi nësahnëk ðus Vikerëh vi soŋe nkabahn bi mo ye Këris. Inji kayëte kerik yëbëlan bëhn wafëhw imbëd g'iryaw̃ gë bëhn wafëhw imbëd gë wahnah g'imbëd (60 gë 95) ga ndëcëk hnagi Yesu ÿa.

Vële ryënkwëko kwëtahnëni va mbërehnëniho hafo njëkëlehnëni cowani. Soŋe rac kerëhnanëkëhni aÿi ahnë inji kayëte ðanko gante kamënahnedëni nko njawënani, antë tavëni nkaŵ ikwëtahn ña.

Wati vacërakëlo va, Wënu ña ntik ikwëtëla gë bulunda lëwu ÿa. Tëhnakëhni vësëna wasadëha do tëyëk wasadëha. Antëhnëkëhni ge ahnë ntik uŵeh, tëfëka njëdfahn intaw̃ soŋe sadëha ÿa, do Wënu ña tavëhnedëha ahnë arac. Inji kayëte nësëk paŋare ikwëtëla kasëk ña nte ntik Wën gë vahnë vële hwëtahnëka Aju va. Ntëbëk ndënkwëryënkwa ña. Kabi ile ntinëhnëkëhni Yesu Këris vahnë va had Ajë Wën, ntëbëk ile ntini vëhni Moyis, gë vacërakëlo vëÿëntaw̃ va. Yesu ye fape Wën fa ale sënaÿik soŋe fop wameh vahnë ña. Umë ye fëna asëna wasadëha asankaf ale rënkëk hnë waÿëw̃a wasëvah w̃a ambin hna. Ale-wo-le hwëtahnëk ÿa bokëna mbala cënana

ntaŵ sadëha soje wameh wadëwu. Wënu ɲa tavëhnëdëha wameh wadëwu ɲa.

Wëlin wanës wakwëhn nafa hn'iɲi kayëte: Wën, sadëha, wameh, Këris, Asëna wasadëha asankaf, wanës, kwëtëla, sariya, Ahwëhn, Abëraham, doku, ikwëry, Ajë, ikwëtahn, wayëwë wasëvah wë.

Wëlin gante nke kayëte ka:

Wënu ɲa nësëhnëkëfu paɓ g'Aju (1.1-4)

Yesu cëpëkëhni wamëleka ɲa gë Moyis (1.5-3.6)

Wënu ɲa njinëgend bulunda lëwu ŷa (3.7-4.13)

Yesu, Asëna Wasadëha Asankaf a (4.14-8.13)

Kwëtëla cër gë kasëk (9-12)

Nkeya nte nëjëdëha Wën (13.1-19)

Iyëfa gë simpaŷi (13.20-25)

Wënu ɲa nësëhnëkëfu paɓ g'Aju

¹ Kobëri ɲa, Wënu ɲa nësëhnëkëhniwo wahwënta wayabah gë sifa gë wasifa vacërakëlo va paɓ gë wakila ɲa.

² Bare gaki, hnë wafac warëkwa li, gë fere Aju nësëhnëkëfu. Gë fere umë Wënu ɲa ntik duniŷa ŷi, do umë tëhnak Wënu ɲa kwëhn viŷë vi fop.

³ Aŷi Ajë ye idanc cëmb Wënu ɲa do hnë fop viŷë hna tufahnëd paryi ile nke Wënu ɲa. Pëlad duniŷa ŷi d'us gë fanka uhnës lëwu wë. Ante ntinënëkëhni vahnë va sadëha soje tavëhnahnini wameh ɲa, ntañak mbin hna farëhw Wën hwëhn fanka hna.

Aju ŷa cëpëkëhni wamëleka

4 Koyëna Wënu ña ntik Aju cëpëhni wamëleka ña, had wãc le njëdfaka ÿa cëpëk walëw hni wã.

5 Gena bi Wënu ña dehnëlahna la mëleka ryampo:

«Ajë mën yeru. Pëgw dol Rëm hu ye bu.»✧

Dehnëlahna fëna la mëleka ryampo:

«Rëm yenëhnëdëfuhä do Ajë yenëhnëdëhö.»✧

6 Bare nte payika Wënu ña d'uniÿa li aryënkwiik nagi ÿa, ntehnëk:

«Fop wamëleka Wënu ña tëfëka cëmbëniha.»✧

7 Soje wamëleka ña Wënu ña ntehnëk:

«Ntidëfuhëhni wamëleka ña sëla,

ha, wale ryokuñëhnëdëhö wã humpen hwëdëh.»✧

8 Bare soje Aju ÿa ntehnëk:

«Wën, ucankaf hu ña mbiÿëd kwëlëkwël.

Anawëhnëdëfuhëhni bulunda hu ÿa g'ucatah,

9 añahnëru ile satëk ÿa, añëwëru wëh wã.

Soje umë ye Wënu ña, Wën hu ha,

tëhnäki do natëndanëki ante turëki wagu ña nkaf li.

Pecehnëka gë wëjë gë vërefal hu va.»✧

10 Wënu ña ntehnëk fëna:

«Wapëgwalahna, wëjë, Ahwëhn, ÿahanëk nkal ña,

wëbäk hu ña lik mbin ña.

11 Vëÿin fop mbëvëd, bare wëjë, nkontëferu kwëlëkwël.

Ambin ña g'inkal inja përekaaf had viÿi vësër,

12 apiÿëdëfuhëhni had cud cankaf;

✧ 1:5 1.5: Wahnëw 2.7 ✧ 1:5 1.5: 2 Samiyel 7.14 ✧ 1:6 1.6: Divëta Sariya 32.43 ✧ 1:7 1.7: Wahnëw 104.4 ✧ 1:9 1.9: Wahnëw 45.7-8

- ha, ankwëcëtëdeni had vëÿi.
 Bare wëjë, nkontëderu kwëlëkwël arac fo,
 do uwám hu ŵa puđina.»✧
- 13 Wënu ña dehnëlahna la mëleka ryampo:
 «Yij alaña g'irëhw mën,
 hafo hale këfëdëfuhëhni vële ÿewëki va
 haryënkwa hu.»✧
- 14 Wamëleka ña wayena bi fop wayir wale
 yohalëdëha Wënu ña? Wënu ña fayëkëhni
 ndemanihëhni vële rëfëka nuÿani ipëh ña had
 ntëw.

2

Wanës wante hod pëhëtëfu

1 Soje umë ye tëfëka kwëtïn hakili gë hawãry
 hnë wanës wante wëryinëk ña đanko antë
 kërënannden toye toye.

2 Wanës wante njëđahnik Wënu ña pađ
 gë wamëleka ña tufëhna toña. Vële wok
 vëlenënenä do wok vëwawëhnëna va nuÿadëni
 ile rëfëkëhni ÿa fop.

3 Awa, fuhnë, hak tëfëka kehaÿin iÿi horot age
 ñwëyinëk inÿi pëh canka? Inÿi pëh, Ahwëhn a
 ryënkwëk pëyahna. Tac vële wëryëk ga nësëde
 va tufënihëfu paryi toña ye.

4 Wënu ña nkwënëk cedeya ntëw hni ña gë
 wëdahëse, fop wasifa vifëmpëhnahnah, do gë
 wayëđ Iyir Ipacah wante cahëdëhëhni vahne
 had gante ñad ka.

Ale yiryeryëdëhëfu g'ipëh

⁵ Soje duniya le yejek yi hnësëdëfun. Gena wamëleka njëdëk Wënu na ucankaf hnë duniya rac.

⁶ Sëñ ryampo hnë Vikerëh hna ahnë yëdahnëk unji cedeya:

«Ye nke ahn'a soje aryënkwëtahna?

Ma ajë ahn'a soje afabahna?

⁷ Kwëtëruha gëd wamëleka hna wati ryoy ryampo,

cankëruha icëmb g'untënah,

⁸ kwëtëru fop gëd wakwer wadëwu hna.»✧

Gante kwëtëd fop Wënu na gëd ucankaf ahnë hna, rac fëhnëtanëk ñoñ tavëna ile wok gena gëd ucankaf ntëwu hna. Bare fuhnë nuyinëhna ten fop mañëhnëka.

⁹ Bare kamahnëbun wañi: Yesu kwëtiko gëd wamëleka hna wati ryoy ryampo, bare gaki, acankik icëmb g'untënah kabi korotëk hafo cëm. Aki paß g'ipërëna Wënu na, cëmëk soje vahnë va fop.

¹⁰ Wënu na lik duniya yi, do fop umë hwëhnëk. Nak vërahu vëyabah nkentahnini hnë icëmb ntëwu hna. Cañahnëka padëna paß gë uhorot wã, umë rëfëka pidëtëhnëhni vutah vuntëwu va nkañ ipëh na.

¹¹ Yesu facënëdëhëhni vahnë va wameh wadëw hni hna do vële facëhnik va fop Rëm ryampo nkeni g'umë. Soje umë ye Yesu cëfëhnëlahna macëhni vëheryu gë vicëru.

¹² Ntehnëk:

«Pëyadëfuhëhni vëhery mën va wãc hu wã;

fagant vële hwëtahnëk hna cëmbëdëmi.»✧

13 Do fëna:

«Kwëtëdëfu tama mën ña hnë Wën hna.»

Do kat:

«Bëlihëfu, ami gë vutah vunte njëdakoŵëhni
Wënu ña.»☆

14 Kabi vutah vutac iÿin kwëhnani ndampo fo —mbahn gë sat— Yesu, umë fëna, ntiyak ahnë had vëhni. Koyëna, g'icëm dëŵu ña, mäk përekan fanka Sintani fa, umë ale wënkwek fanka icëm ña,

15 do mäk pehëtëhni vële yeho vëramp hnë uwám lëŵ hni hna fop kabi ntakëkëhniwo g'icëm ña.

16 Ha, pacëk gena wamëleka ndemaď, bare vutah Abëraham gë vërah hni.

17 Soŋe rac ye tëfëkawo mëntëlënti gë vëheryu va hnë fop, ďanko nkehahn asëna wasaďëha asankaf ale pëbëk kaÿëhnahn do hahnëndak ďoku Wën hna, do kod njëďahn sadëha le tavëhnahnëďeni bulunda ÿa wameh wadëŵ hni.

18 Ha, kabi Yesu korotëk umë dënk yëkëhnahn hna, kod ndemahni vële yëkëhnahnik va.

3

Yesu ntëbëka Moyis

1 Awa, vëÿënta mën vëfacah, yëkëryina Yesu, wühnë vële macëk Wën. Umë ye ale payik Wën do ye asëna wasaďëha asankaf hn'ikwëtahn nte fëyahnedën.

☆ 2:13 2.13: Esayi 8.18

² Wënu ɲa tëhnaka soɲe iyi doku do kahnëndako, had gante nkeho Moyis hnë cery Wën hna fop.✧

³ Ale yëryëk cery ntënënik ntëbi cery ɲa dënk. Aki Yesu rëfëka nuɲa untënah ntëba Moyis.

⁴ Cery-wo-cery ahnë yëryëk, bare Wënu ɲa ye ale yëryëk fop ɲa.

⁵ Moyis, cape ntëwu ɲa, kahnëndako hnë fop cery Wën hna, gante nkeho aryokun ale hwëtehnahnik cedeyahn ile ntehnëd Wënu ɲa hnë wati le yejëk.

⁶ Bare Këris, cape ntëwu ɲa, kahnëndak hnë cery Wën hna, gante nke Ajë ale hwëtik nkaf. Do cery ntëwu ɲa yeyinëk, ge kwëtayinëk idëkëna dëw fu ɲa do mbëntaryin itama fu ɲa.

Wënu ɲa njinëgehnëd bulunda lëwu

⁷ Soɲe umë ye, had gante ntehnëk Iyir Ipacah ka:

«Dol, ge nkwëryërun kopa Wënu ɲa,

⁸ antë afidu sakahn hun ha, had kobëri ka ante ntancëntirunëho ɲa, wati rac, wula hna, njëkëhnahnërunëhawo.»✧

⁹ Do Wënu ɲa nkok ntehnënd:

«Hnam njëkëhnahnëniho vacërakëlo hun va do nuni ile libuho ɲa

¹⁰ hnë wabëhn wafëhw wanah hna (40). Soɲe rac ntavëko gë vëhni do ntehnëbu:

“Ntaɲary ntëw hni ɲa pitad g'ami kwëlëkwël.

Vëyëtëna nkaɲ mën ɲa.”

¹¹ Hnë ntavah mën hna, akwëryëbu:

“Vëyëtëdina muk yinëga mën ɲa!”✧»

12 Vëyënta mën, kwëtëryin hakili fagant hun ahnë ntë kwëhna ntaŵary meh nte wok kwëtahn hna, nte liyehnëdëha tav a Wën hunte wok cëmëdina.

13 Bare, fac-wo-fac, kamënaŷehnelëryin wati le nkok mbiŷëd ile macëk Vikerëh vi «dol», ðanko ahnë-wo-ahnë antë pid sakahn lëŵu kabi tavëk wameh ɲa tokahna.

14 Ha, vërëfal Këris yeyinëk ge kwëtayinëk paryi hafo wapuyala hna tama nte hwëhnayinëko wapëgwalahna.

15 Had gante ntehnik ki:
«Dol, ge nkwëryërun kopa Wënu ɲa,
antë afidu sakahn hun ha,
had kobëri ka ante ndáncëntirunëho ɲa.»✧

16 Mo wëryëk do ryáncëntik? Vële canëko Moyis Esipët va ye.

17 Mo lavëndanëka Wënu ɲa wabëhn wafëhw wanah (40)? Vële wënek va do sëmëk hnë wula hna ye.

18 Wënu ɲa nkwëryëk: «Vëyëtëdina muk yinëga ntëŵu ɲa.» Vëhni mo kwëryëhnëk? Vële ɲwëŷëhnëkawo va ye.

19 Tac kamahnëbun vëŷin: vëwëkëna njëtëni yinëga Wënu ɲa kabi vëhwëtahnëna.

4

1 Awa, kwëtëryin hakili, hnë wati le kođen njëtin yinëga nte njëdëdëhëfu Wënu ɲa, ahnë antë tak!

² Pěyayiněķefu uŵi hnēs hasěk yinēga nte pēhwētanēhněķefu Wěnu ņa, had gante pēyayiniho vacērakēlo fu va. Bare uhnēs ule nkwěryēni ŵa nēfalihna kabi vēvēmēnkēlēna hn'ikwētahn gē vēle hnēpak va.

³ Fuhnē vēle hwētahniněk va njetēden yinēga ņa, had gante ntehněk Wěn ka:

«Kwěryēbu hnē ntavah mēn hna:

“Věyētēdīna muk yinēga mēn ņa!”»✧

Aki nēsěk Wěnu ņa ayēkat puhnako doku leŵu ŷa kobēri wapēgwala duniŷa hna,

⁴ kabi nēsik hnē Vikerēh hna soņe fac hwēhn mbēd gē wahi ŷa: «Awa hnē fac hwēhn mbēd gē wahi hna Wěnu ņa tiŵako.»✧

⁵ Do ani fēna nēsěk kat: «Věyētēdīna muk yinēga mēn ņa.»✧

⁶ Awa, nkoyik maŵěryanini vēryampo njetēni yinēga ņa do vēle ryēnkwěk hnuŷak Wanēs Wakasěk ŵa vēyētēna yinēga ņa kabi vēŵawēhnēna.

⁷ Soņe umē ye Wěnu ņa mbok kwētēhnēhni fac, do macēka «Dol». Ga mbiŷěk dŵus, nēsěk rac gē ŵēs David ŷa, had gante rěk kerik ki:

«Dol, ge nkwěryērūn kopa Wěnu ņa,

antē afidū sakahn hun ha.»✧

⁸ Paryi, ge Yosuwe njokēndēhēhniwo bulunda ŷa hnē inŷi yinēga, Wěnu ņa nēsakēndilohna soņe fac haŵary kamēhni rac.

⁹ Awa, umē fēhnētaněk tiŵa bulunda Wěnu ņa nkok.

✧ 4:3 4.3: Wahněŵ 95.11 ✧ 4:4 4.4: Wapēgwala 2.2 ✧ 4:5 4.5: Wahněŵ 95.11 ✧ 4:7 4.7: Wahněŵ 95.7-8

¹⁰ Ale yètëk yinëga nte pëhwëtanëhnëkëfu Wënu ña, njinëgak umë fëna doku lëwu hna had gante njinëgak Wënu ka hnë doku lëwu.

¹¹ Kamënanëfu njëtin yinëga tac d'anko ahnë antë njo soñe injëwë mawëhn had vacërakëlo fu ka.

¹² Ha, Wanës Wënu ña kwëhna uwám wã do pëbëka fanka fa. Ntëpëtëd ntëbi sëlame hwëhn wanëkan wahi. Tënkëdëhëfu hafo pitëndëlehn ntañary ña gë yir inja, wasokël wã gë sevul wayëc wã. Kitiñëd vinahan gë viña wasakahn fu wã.

¹³ Wënu ña nud fop. Fop vile ntik va cowëtak haryënk w lëwu, umë rëfëka pëyayin fop ile liyinëk ña.

Yesu, Asëna Wasadëha Asankaf

¹⁴ Koyëna, kabi kwëhnayinëka asëna wasadëha asankaf ale ryëcëtak vambin va, Yesu, Aju Wënu ña, yañënënefu ile hwëtahnënik ña.

¹⁵ Asëna wasadëha asankaf ale hwëhnayinëk a njëtëk d'us kihñ dëw fu ña. Njëkëhnahnik had fuhnë, hnë fop viyë vi, bare umë menëna.

¹⁶ Pëñanëfu g'idëkëna tinki Wën hn'ile nke ipërëna ña d'anko nuñahnin kohnëcan do tëkatin ipërëna nte ryemadëhëfu wati nte mbalëdëhëfu ña.

5

¹ Asëna wasadëha asankaf-wo tëhnayik fagant vahnë va, akwëtëhnahnik nëmpëtëhni vahnë va haryënk w Wënu ña. Njëdahnëd wayëd walëw hni wã gë wasadëha walew hni wã soñe wameh ña.

² Kabi kihnek umë dënk kod tufëhni iguk sakahn vële wok vëyëtëna ñoñ do sëvëd.

³ Soje ikihn tac, tefëka cëna wasadëha soje wameh wadëwu ña ndampo fo gë wameh bulunda ña.

⁴ Ahnë kodina njedëhna untënah nke asëna wasadëha asankaf. Wënu ña wacëd soje rac, had gante macëka Aron.

⁵ Ndampo fo nke soje Këris ÿa. Gena umë yedëhna untënah nke asëna wasadëha asankaf. Nuÿak gë Wënu ña ale lehnëk:
«Ajë mën yeru.

Pëgw dol Rëmuh yebu.»[☆]

⁶ Ntehnëk señ ryaw:

«Asëna wasadëha yeru soje kantëm,
had Melëkisedek.»[☆]

⁷ Hnë wati nte nkeho nkal li, gë kopa sankaf do gë wankwën Yesu njedaka ale hod pehëta icëm ña wayëfa do wañunta. Wënu ña nkwëryëhnëka soje mañëhn ntëwu ña.

⁸ Ajë Wënu ña ye, toña ye, bare hnë wahorot walëwu hna fop mëkëk njët mañëhn ña.

⁹ Do aki, ante tækëk fadah hna nkenëhnëkëhni vële wawëhnëka va hayalin ipëh kantëm.

¹⁰ Ha, Wënu ña wacëka nke asëna wasadëha asankaf had Melëkisedek.

Kehanëfu antë tavin ikwëtahn fu ña

¹¹ Kwëhnayinëk yabah ile hnësëden soje rac, bare ntakëk nkabani, kabi nkwëryëdïluhna ñap.

[☆] 5:5 5.5: Wahnëw 2.7 [☆] 5:6 5.6: Wahnëw 110.4

12 Wati ÿa gwërënkehuno ile yehah-nakëndunëho vēharaŋ! Bare doliÿi, mbalëku aharaŋiwu g'ahaw̄ary karëŋa ndënkwëryënkW Wanës Wënu ŋa. Kodiluhna aroku roka yaw̄ah, wambël valëku.

13 Ale wok seŋ wambël fo nke had fanul. Yëtëna ten ile satëk hn'uwám hna.

14 Vicër va roka yaw̄ah tokëdëni, njetëni këncëtëlehna ile yivëk g'ile wëk kabi ntidëni rac kwëlëkwël.

6

1-2 Aki, antë nkohahnin karëŋa nte ryënkwihnëk ÿëŋayinëk soŋe Këris: rac ye ikwëtahn Wënu ŋa do itav nkeya nte yodf g'icëm; karëŋa wayaryi gë tind wëbák ŋa; ibëhn vësëm gë kiti Wën le wok puđina. Ha, antë mbokahnin inŋi karëŋa ndënkwëryënkW, bare yinëfu cape g'ikarëŋa nte rëfëka acër.

3 Wëlin ile liden ÿa, age Wënu ŋa maŵëryanëkéfu.

4-6 Gena bi kodena mbok njoyini g'igwëcët higëna nkeya ntëw̄ hni, vēle hnuÿak fac ryampo humpen Wën ha, do ryahëk uyëd ambin, hnuÿak sah hnë Iyir Ipacah, rëkatëk gante njivëk Wanës Wën do yëtëk fëna fanka duniÿa le yejëk ÿi, bare mbokanëni nkeya cër ntëw̄ hni ŋa? Nke had, soŋe lëw̄ hni dënk, mbokaryëdëniha Ajë Wënu ŋa kërëwa hna do cëfëhnaÿehnëniha bulunda hna.

7 Ante cek nkal inŋa wënka rëv le rëk rëvëdëha ÿa do pëhnëndan wanëda wante nëfadëhëhni vēyam va, nuÿad dëwara Wënu ŋa.

⁸ Bare ge pëhnëndanëk wadëmpëhn do dël meh, kitiñjik kwëhnana nafa, këbënanik dëwara wëh, do patand gë hwëdëh.

⁹ Bare wühnë, vëyahnik mën, age nësëbun aki, apacahnëkëfu gë cape përen nkerun, rac ye ipeh ña.

¹⁰ Wënu ña catëk; dënkweđina vantiyehn hun va do ñahn nte rufahnërun cape wac lëwu ga ndokuñëhnëdfunëhëhniwo kobëri ña vëfacah va, do iyi wati fëna.

¹¹ Ñadëfun paryi ale-wo-le tufahn ikamëna tac fo hafo pu danko fop itamahn hun ña ntiya.

¹² Ñadilëfuna ayewu vëhëmak, bare tëfëtalahnëryinëhni vële hnuyad, g'ikwëtahn do g'iduñëna, had ntëw ile ntehnëk Wën njëdadëhëhni ña.

Ile ntehnëk Wënu ña njëdadëhëhni vahnë va tokadilëhniha

¹³ Ante ntehnëko Wënu ña iñë ntinëhnëdëha Abëraham, kwëhnalañohna ahnë ale ñak nañëk ale kwëryahnëd, awa, më kwëryahnëk umë dënk

¹⁴ ntehn: «Ha, pëbënëdëmi idëwara do njabënëdëmi.»[☆]

¹⁵ Abëraham nduñënako nap do nuñako ile ntehnëkawo Wënu ña.

¹⁶ Vahnë va kwëryahnëdëni wac ale lëbëkëhni vëhni dënk. Kwëry ña tëkwenëd gwajëtël ña fop.

[☆] **6:14 6:14:** Wapëgwala 22.16-17

17 Fëna Wënu ña, pacënëhnëkëhni g'ikwëry vële lëwëd ile ntehnëkëhniwo ÿa; ñak tufëhni ipëhna tac gwëcëtaďina muk.

18 Aki, gë vantiyehn vaki vatac vante wok gwëcëtaďina nkok kodina mër Wënu ña, njonëhnikëfu kamënaŷehn camah, fuhnë vële rënkayinëka va, soŷe pëlahnin đus tamahn nte ye haryënkw fu.

19 Tamahn tac nkenëhnëkëfu had nkahn uwám lëw fu; njaŷek đus, kodena nkëci, do tamahn tac ndëcëk pand đëndah[☆] mbë rënka ña hafo hn'ile cëvak hna,

20 hn'ile ndënkwëhnëkëfu Yesu hna, umë ale ye gaki asëna wasaďëha asankaf soŷe kantëm had Melëkiseďek.

7

Melëkiseďek, Ahnaŷ do Asëna Wasaďëha

1 Aŷi Melëkiseďek, ahnaŷ avë nkol Salem do asëna wasaďëha Wën Hunte Sëpëk Fop ŷa ye. Njik pankëläni gë Abëraham, nte mëncidëho gë wët le mbëvehnëkëhniwo vënaŷ, do Melëkiseďek ndëwaka.

2 Do fëna, Abëraham më njëďaka ryampo hnë pëhw fop ile nuŷako wët hna. Melëkiseďek fëhnëtanëk «ahnaŷ usatah», do fëna ahnaŷ Salem yeho, umë fëhnëtanëk «ahnaŷ yam».

3 Kwëhnana rëm, kwëhnana hnëm, kwëhnana hnënk, kwëhnana wapëgwala soŷe wafac walëwu, kwëhnana puyala soŷe uwám lëwu.

☆ 6:19 6:19: Soŷe Walevi 16.2; Lik 23.45

Had Aju Wënu ña, nkođ asëna wasadëha soñe kantëm.☆

⁴ Yëkëryin inaỹ Melëkisedek ña! Lakënde Abëraham acërakëlo alëw̃ fu ãa, njëđfaka ryampo hnë ipëhw ile nuỹako wët hna.

⁵ Sariya Moyis ãa ntehnëkëhni vële ye vësëna wasadëha va hnënk Levi hna tebani ryampo hnë ipëhw vile nuỹadëni vëỹenta hni va, vële yentahnik hnënk Abëraham hna fëna.

⁶ Bare Melëkisedek, ale wok gentahnina hnë hnënk Levi hna, nuỹak wák Abëraham hna ryampo hn'ipëhw ile nuỹak ãa do ndëwaka Abëraham, ale ntehnëko Wën njëđfad iñë.☆

⁷ Do nkwayëla këm, ale hnaỹëk a ryëwadëha ale vak a.

⁸ Cape ndampo, vutah Levi vële hnuỹad ryampo hn'ipëhw viỹë va, vële sëmëđ ye; cape ñëntaw̃ ña, Melëkisedek, ale hnuỹak sah rac ãa, cëmëna, had gante cedeyahnik ki.

⁹⁻¹⁰ Gena bi Levi mbahn Abëraham hna nkoko, wati nte pankëlëniho Abëraham gë Melëkisedek ña? Awa, kofe nësi, lakënde Levi, ale hnuỹad ryampo hn'ipëhw hna, njëđfaka Melëkisedek ryampo hn'ipëhw hna.

Yesu had Melëkisedek

¹¹ Sariya le njëđayik bulunda ãa pëlalëk gë đoku sadëha mba hnënk Levi ãa. Age ufadah w̃a ntikënde gë đoku hnënk Levi ãa, iỹihne uval yekënd fëna ntiyi asëna wasadëha ahaw̃ary hnë hnënk Melëkisedek hna, hara gena hnënk Aron ãa?

☆ **7:3 7.3:** Wapëgwala 14.18-20 ☆ **7:6 7.6:** Wapëgwala 12.2-3

¹² Do ge sifa ile nke asëna wasadëha ÿa nkwëcëtak sariya ÿa fëna tëfëka nkwëcëti.

¹³ Kabi Ahwëhn fu ÿa, ale hnësahnik wañi ña, hnënk haŵary nkentahnik, do ahnë hnë hnënk rac d'okuñëna muk had asëna wasadëha.

¹⁴ Njëtinëk fuhnë fop, Ahwëhn fu ÿa hnënk Yudfa matik, do muk Moyis dehnëna asëna wasadëha nked hnë iÿi hnënk.

¹⁵ Wëlin ile facënëk wante rëk hnësihnëk ñi: asëna wasadëha ale yijëk ÿi mëntëlëni gë Melëkisedek.

¹⁶ Gena asëna wasadëha had gante ntehnëk sariya ÿa soñe vutah Levi bare kabi kwëhna fanka uwám ule wok kodena mbëvehni.

¹⁷ Uñi cedeya mbësayik:

«Nkeru asëna wasadëha soñe kantëm,
had Melëkisedek.»✧

¹⁸ Cape ndampo, sariya sër ÿa ntihetik kabi kwëhna lohna fanka do kodilohna ntiñëñëfu ile valëkëfu

¹⁹ kabi sariya ÿa ñoñ yona hnë ufadah hna. Gë cape ñëntaŵ, tufinëkëfu tamahn nte fecehnëka ñëntaŵ, nte fëñahnëdenëha Wënu ña.

²⁰ Ntëbi umë, nkehëhna ikwëry. Vëyëntaŵ va nkeni vësëna wasadëha ikwëry këm.

²¹ Bare ale hnësahnëden ÿa ye asëna wasadëha g'ikwëry kabi Wënu ña ntehnëka:

«Ahwëhn a Wënu ña nkwëryëk,
do gwëcëtëdina nahan ntëwu ña:
“Nkeru asëna wasadëha
soñe kantëm.”»✧

22 Soŋe rac, Yesu ye ale lik kwëtëla nte ye fagant Wënu ŋa gë fuhnë; tac fecek gë ñëntaŵ.

23 Njabëniho vësëna wasadëha va kabi cëm iŋa memaÿehnekëhni nkohahnëni doku lëŵ hni hna;

24 ßare Yesu, kabi nkoŋ soŋe kantëm, nke asëna wasadëha avë kantëm.

25 Soŋe umë ye koŋ pehëtëhni dol gë kantëm vële fëŋadëha Wënu ŋa paß g'umë. Kabi uwám leŵu ŵa puđina, nkoŋ soŋe kantëm njëfanëhni.

26 Aki Yesu ye asëna wasadëha ale rëfëkëfu ŷa: afacah, dënt këm, ale wok menëna, ale fitik gë vëŵen va, ale hayëndik yaŋ cëp ambin.

27 Balëlahna njëdahn fac-wo-fac wasadëha, had vësankaf vësëna wasadëha vëÿëntaŵ ka, ten soŋe wameh wadëŵu, tac soŋe wameh bulunda ŷa ntik rac hwënta ryampo fo gë yëdëhna dëŵu ŋa dënk do rac gwër nke soŋe kantëm.

28 Sariya ŷa tëhnakëhni vësankaf vësëna wasadëha fagant vahnë vële hihnëk; ßare ale ntik Wën asëna wasadëha asankaf g'ikwëry nte rëfidëha sariya ŷa, Aju ŷa dënk ye, apadënik soŋe kantëm.

8

Yesu, asankaf vësëna wasadëha fu

1 Wëlin ile ŷak nëfak ŷa hn'ile ŷadëfun hnësëfu ŷa: iÿi sifa asëna wasadëha asankaf hwëhnayinek. Ntañak mbin hna, farëhw tinki Wën hwëhn fanka hna.

² Ntid ðoku lëwu ŷa hn'ile cëvak hna, hn'usank paryi nte kahnëndëk Ahwëhn a, gena gë wëbák vahnë.

³ Asëna wasadëha asankaf-wo tëhnayik soŋe njëdahnënd wayëd wã gë wasadëha vahnë; afo alëw fu ŷa fëna kwëhna ile njëdahnëd.

⁴ Age Këris nkal hna nkokënd, gekëndina asëna wasadëha, kabi nkeni vësëna vële yëdahnëd wayëd had gante tëyëk sariya Moyis ka.

⁵ Usank le ndokunëhnëdëni ŷa iwëntëlënta do cën usank vë ambin ŷa ye. Ante ñadëho Moyis pëgw yëry sank wã, Wënu ŋa pëyaka: «Yëkëry, ntiduf fop had gante nke sifa vile rufiru kuŋ vi.»✧

⁶ Bare gaki, ðoku le nuŷak Yesu ŷa cëpëk ðoku lëw hni ŷa, kabi umë ye arëkëtëlehn kwëtëla nte lëbëk ðus ñëntaw ŋa, nte hahnëndik hnë ile ntëhnëkëhniwo Wën ntid ŷa kabi rac lëbëk fop. Bare gaki, ile ntehnëk Wën ntid ŷa fecek. Rac lik ðoku asëna wasadëha le nuŷak Këris ŷa cëpëk fop wayëntaw wã had gante nke ikwëtëla, le nke Këris arëkëtëlehn hna, nte lëbëk ndënkwëryënk wã.

⁷ Age kwëtëla ndënkwëryënk wã ŋa kwëhnakëndina ile keyande, balakëndilëfuhna nëmpëti gë haŷary.

⁸ Bare soŋe walënt bulunda lëwu ŷa keyahnëdëhëhni Wënu ŋa do ntehn: «Ami Ahwëhn a ntehnëbu: «Wafac wã nkejëk hn'ile ntidëfu kwëtëla kasëk gë bulunda Isërayel ŷa do gë bulunda Yuda ŷa.

✧ 8:5 8.5: Icahn 25.40

9 Gedfina had kwëtëla
 nte libuho ɲa gë warëm hni
 fac le hnufibuhëhniwo ɲa
 yiryeryëwëhni ɲawët nkal mbë Esipët ɲa.

Kabi vëlënëna
 kwëtëla mën ɲa,
 ami fëna tavëbuhëhni.»

10 Ahwëhn a nkwënëk:
 «Wëlin kwëtëla nte hwëtëlahnëdëfun
 gë bulunda Isërayel ɲa
 ga ndëcëk wafac warac;
 kwëtëdëfu sariya mën ɲa
 hnë vinahan vidëw hni hna
 do kerëdëfu hnë vintaŵary vidëw hni hna.

Nkedëfu Wën hudëw hni,
 do nkedëni bulunda mën.

11 Ahnë bokëdfina karan ɲa avë yalëntaŵ
 ma aŷëntaŵu, ntehn: “Yëtëryehna Ahwëhn
 a!”

kabi fop njëtëdëniho,
 pëgw vutoy hafo vëhnaŷah.

12 Tavëhnëdëfuhëhni ile ntidëni wok catëna ɲa
 do bokëda ryënkwëtaŵ wameh wadëw hni
 ɲa.»[☆]

13 Ante macëd Wënu ɲa inɲi kwëtëla «kasëk»,
 ntik ndënkwëryënk ɲa goryeryëna nafa. Do ile
 sërëk ɲa do wok goryeryëna nafa ɲa, godfina.

9

Kwëtëla cër gë kasëk

☆ 8:12 8.12: Seremi 31.31-34

1 Kwëtëla ndënkwëryënkw ña kwëhnako wasariya gante tēfëka njëfaniha Wënu ña do kwëhnako fëna hn'ile ñak cëvak nkal li.

2 Usank wã pëhwëtiko ßambery; cape ndënkwëryënkw ña wacik Yëwã Sëvah, hn'ile nkeho iyul walampu, tabali yã gë vamburu hwëhn sadëha yã per.

3 Tac, hamëhni ipand dëndah kigëna hna nke cape higëna nte wacëde Yëwã le Yãk Sëvak,

4 ile hwëhnako tabali hn'ile pëdëde idud ña do ipër ña sanu fo yehawo gë kwëni kwëtëla nte yehawo ipër ña sanu ña; hnë umë peya sanu nte hwëtahnik mburu nte wacik man, gë ryoko Aron nte hnëpëdëho ña do wëraka hn'ile kerik kwëtëla ña.✧

5 Yañ kwëni hna nkeniho wamëleka wante wacik waseruben wante rufahnëd Wënu ña hnam nke. Kuvëniho g'icën vampaŵ vantëw hni va hn'ile tavëhnëdëho wameh hna. Bare gena gaki tēfëka nkabani.

6 Ga pëhwëtik fop, vësëna wasadëha va tēnkëdëniho kwëlëkwël hnë cape ndënkwëryënkw hna soñe padënahneni doku lëw hni yã.

7 Bare, hnë cape higëna hna, asëna wasadëha asankaf a fo rënkëd hnam hwënta ryampo fo bëhn hna. Afo njo sat ntaŵ cënahñ sadëha soñe wadënt wadëwu ña gë wadënt bulunda yã wante ntini hara vëyëtëna.

8 Iyir Ipacah ña tufahnëk aki nkaŵ nte rënkahnëde waŷëwã wasëvah hna tufahnina,

✧ 9:4 9.4: Icahn 16.13-15,31

wati le nkok dihëtina usank ryënkwëryënkw wã.

⁹ Virac rufahnëf ile ryëcëtaď gaki yi. Wayëď gë wasaďëha wale njëďaďëniha Wën kodina pacën hakili vële yijëď cëmbëniha koyëna va.

¹⁰ Wasariya soŋe mbahn fo ye: virokëtok, visece, do igwiyëta wëbák ge wakwer. Vëyïn fop nkoď hafo Wënu ŋa nkwëcët.

Saďëha Këris yã

¹¹ Bare Këris njijëk had asëna wasaďëha asankaf viyivah vile rëk yijëk vi. Njijëk paď g'usank ile yãk fadëk do lëbëka nafa yëntaŵ ŋa do le nkok dina vák ahnë. Umë fëhnëtanëk kwëhnëna ďuniyã le liyik yi.

¹² Gena gë sat va wahotohn gë vuñihni, bare gë sat lëwũ wã dënk tënkahnëk hwënta ryampo fo hnë wayëwã wasëvah hna, do nuyahnëkëfu ipëh soŋe kantëm.

¹³ Kabi ge sat wahotohn wã, wëďahni ŋa nte cëlëvini vahnë va ma ibëhn yank nte pihini vële ronkëk va pacënëďëhëhni vimbahn va,

¹⁴ wahwënta wayëhw ga sat Këris yã ntëbëk rac! Këris, paď g'Iyir kwëhn kantëm ŋa, njëďëhna umë dënk gë Wën had saďëha le wok kwëhnana dahëse wëh, pacënëď hakili lëwũ fu yã ďanko vantiyëhn fu antë njofu g'icëm soŋe njohalahninëhna Wën hunte wok cëmëďina.

¹⁵ Wëlin ile nkehahnëk Këris, umë fo, arëkëtlehn fagant fu gë kwëtëla kasëk ŋa, ďanko vële macëk Wën va nuyani ntëw vë kantëm nte ntehnëk njëďaďëhëhni vëlëwũ va. Icëm ile valëkëfu yã ntiyak. Icëm ntëwũ ŋa

pehëtëkëhni vahnë va wameh wante ntini wati kwëtëla ndënkwëryënkwa ɲa.

¹⁶ Hn'ile-wo-le nke wanës watëkwa hna tëfëka tufahni ale liyehnëk a cëmëk.

¹⁷ Wanës watëkwa ɲa maŋik-wo hara icëm liyak; kwëhnana fanka age ahwëhnu ŷa cëmëna.

¹⁸ Tac fëna akwëtëla ndënkwëryënkwa ɲa dënk cëbilohna bi hara turina gë sat.

¹⁹ Moyis pëyakëhniŋwo ten fop bulunda ŷa vakwëda va fop hnë sariya hna. Tac nufëk sat vuni va gë wahotohn ŵa, gë wënkwa, gë fani atëh nte ŵacik isop, gë ŵuñahn ife wante vëntënik. Cëlevëk kayëte sariya ɲa do fop bulunda ŷa

²⁰ do ntehnatënd: «Iŷin ye sat kwëtëla nte ntehnëku Wënu ɲa alënënu.»[☆]

²¹ Moyis cëlevëko fëna gë sat sank ŵa do fop viŷë vile valëtahnik soŋe wasadëha gë wayëfa vahnë.

²² Gante nke sariya ka, viŷë viyabah gë sat pacënëde, do wameh ɲa tavëhnëde afo ge sat rurayik.

²³ Koyëna tëfëka pacëni viwëntëlënta vile ye ambin va gë wasadëha bare tëfëka vile ye ambin va dënk pacëni gë wasadëha wale ŷak fecek.

Itënk Këris g'ambin

²⁴ Këris tënkëna hnë wayëŵa wasëvah wale ntini vahnë, wale ye wëntëlënta wavë paryi ŵa. Hnë mbin hna dënk tënkëk, hn'ile tufëhna gaki haryënkwa Wënu ɲa soŋe lëŵ fu.

²⁵ Do tënkëna njëdëhna umë dënk wahwënta wayabah, had asëna wasadëha asankaf ale

[☆] 9:20 9.20: Icahn 24.8

rënkëd bëhn-wo-bëhn hnë Yëwã le Ñak Cëvak hna gë sat le wok gena lëwu.

²⁶ Ge gena umë, tëfakëndëha korot wahwënta wayabah kobëri wapëgwala duniya hna. Toña ya, gaki karyëtajëk hwënta ryampo fo, wapuya wati hna, soje tëkwehn wameh na gë yëdëhna dëwu na had sadëha.

²⁷ Fop vahnë vi tëfëkëhni cëmëni hwënta ryampo fo, do kitinëhni Wënu na.

²⁸ Koyëna fëna, Këris ya njëdahnik sadëha hwënta ryampo fo soje ntihët wameh vahnë. Mbokëd karyëtaj higëna, gena mbok ntihët wameh, bare pehëtëhni vële hnapëdëha g'iduñëna këm.

10

Sadëha ryamboli le fehëtëd

¹ Sariya Moyis ya cën vifërën vile yejëk vi fo ye; gena paryi viyë virac. Soje rac wasadëha wale yëdahnëde bëhn-wo-bëhn wa, wale ye kwëlëkwël warac fo wa, mëkëdina padën ipacën vële fëjadëha Wën va.

² Age vële yëdadëha iyi sifa wasadëha Wënu na pacënakëndëni soje kantëm wameh wadëw hni na, vëvokakëndina ndëñëni soje wameh wadëw hni na, do vëvokakëndina cënani sadëha soje wameh na.

³ Bare bëhn-wo-bëhn, waïi wasadëha ryënkwëtehnëdëhëhni vahnë va wameh wadëw hni na,

⁴ kafi sat wëdahni na gë wahotohn wa kodina ntihët wameh na.

⁵ Soŋe rac, ante tēnkēk Kēris duniŷa hna, ntehnēk:

«Ńalihna wasadēha do wayēd,
bare ntinēhnēruho mbahn.

⁶ Nēŋahnēlihna sadēha wulaw̄ wale fēdīk cēna
sadēha hna
do wasadēha soŋe wameh ŋa.

⁷ Tac ntehnēbu: “Wēli, Wēn mēn, njiŋēbu ami
dēnk,
soŋe liwu iŋa hu ŋa, gante kerik ka paŋare
mēn ŷa

hnē Kayēte Pacah hna.”☆»

⁸ Mē ntehnēk ten: «Ńalihna do nēŋahnēlihna
wasadēha, la wayēd, la wulaw̄ wale fēdīk cēna
sadēha hna, la sadēha soŋe wameh ŋa.» Bare
waŷi wasadēha cēnayik gante ntehnēk sariya ka.

⁹ Do mbok nkwēn: «Wēli, Wēn mēn, njiŋēbu
ami dēnk, liwu ile ŷadu ŷa.» Ntiŋētēk
ryēnkwēryēnkw ŷa soŋe kahnēndahn higēna
ŷa.

¹⁰ Yesu Kēris ntik iŋa Wēnu ŋa; njēdahnēk
mbahn dēwu ŋa hwēnta ryampo soŋe fop, do
aki pacēninēkēfu wameh ŋa.

¹¹ Asēna wasadēha-wo kahnēd fac-wo-fac
soŋe doku lēwu ya; njēdahnēd kwēlēkwēl
wasadēha warac fo, wante wok kodina ntiŋēt
muk wameh ŋa.

¹² Bare Kēris njēdahnēk sadēha ryampo fo
soŋe wameh ŋa, do rac soŋe kantēm, tac ntaŋak
farēhw Wēn hna.

¹³ Kobēri wati rac, napēd Wēnu ŋa kēfēhni
vēŷeŷ vēlēwu va haryēnkw lēwu.☆

14 Gë sadëha ryampo ntik nkeni vahnë vëfadah soje kantëm vële ye nkaŵ pacën.

15 Rac ye ile cedeyahnëdëhëfu Iyir Ipacah ña, umë fëna. Ntehnëk ten:

16 «Ahwëhn a pëyahnek: “Wëlin akwëtëla nte hwëtëlahnëdëfun gë vëhni
hnë wafac wale yejëk,
kwëtëdëfu wasariya mën
hnë wasakahn walëŵ hni hna
do kerëdëfu vinahan vidëŵ hni hna.”»

17 Nkwënëk fëna:

«Bokëda ryënkwëtawu wameh wadëŵ hni ña
g'ile nkoni vëlënënëna sariya ÿa.»[☆]

18 Age itavëhn wameh ña nkehëhna bokëdëna ntiyi sadëha soje wameh.

Pëñanëfuna Wënu ña

19 Vëyënta mën, aki, gë sat Yesu ÿa kodën tënkin g'idëkëna hnë wayëŵa wasëvah hna.

20 Pidëtëhnëkëfu nkaŵ kasëk nte yiryeryëd g'uwám paß g'ipand dëndah nte ye rënka hna, rac ye mbahn ntëŵu ña dënk.

21 Kwëhnayinëka asëna wasadëha asankaf ale hwëtik nkaf cery Wën hna.

22 Awa, pëñanëfuna Wënu ña gë ntaŵary catah do g'ikwëtahn padah, g'idëñ soje wameh wadëŵ fu ña pacënik do g'imbahn nte yaryik gë wënka wapacah.

23 Njawëñënëfu d'us tama nte sedeyanden ña, kabi Wënu ña nkok kahnënda hnë ile ntehnëkëfu hna.

[☆] **10:17 10:17:** Seremi 31.33-34

24 Yëkënëfu dŕus hak tēfëka kamënaŕyehnëlin dŕanko tufahnin inŕahn do ntiyin ufërën.

25 Antë tavin vambara vantëŵ fu va had gante tēk ntindëni vëryampo. Hali! Kamënaŕyehnëlënëfu do fëna gë haŵary ante nudun pëŕajëd Fac Ahwëhn a.

26 Ge nkoyihnëk menënden wakwëhna mpër njëtaten toña ŕya, sadëha ile hođ ntihët wameh watac godina.

27 Ile wojëdëhëfu ŕya napin g'untakah kiti Wënu ŕa do hwëdëh hucankaf hunte vëvend vëŕëŵ vëlëŵu va.

28 Ale wok mawëhnëna sariya Moyis ŕya ndawik kayëhnahn këm ge nkeni vëhi ma vërar vële sedeyahnëk idënt ntëŵu ŕa.✧

29 Ale yafëka Aju Wënu ŕa tēfëka uhorot ule hambëk ntëbi ryënkwëryënkw ŕi, umë ale yafëk sat kwëtëla nte pacënahnik ŕa, do yewëk Iyir nte ye hayalin ipërëna.

30 Anjëtinëka ale lehnëk a: «Ami hwëhnëk igwëcan ŕa! Ami sosëd», do lehnëk kat: «Ahwëhn a hitijëd bulunda lëŵu ŕa».✧

31 Age Wën hukantëm ŕa pëlaka ahnë, antakëmak dŕus!

32 Dënkwëtaryin wafac waryënkwëryënkw ŵa, nte nuŕarunëho humpen Wën hunte fehnëkuno ha: akorotërunëho dŕus, mëkarunëho wët hambah.

33 Mpëd ampëd njewëderunëho do ntiyirunëho këm fo tase bulunda fop, mpëd

✧ **10:28 10:28:** Divëta Sariya 19.15 ✧ **10:30 10:30:** Divëta Sariya 32.35-36

ampëd an kentahnirun uhorot ale liyiko koyëna
ÿa.

³⁴ Korotëntirun had cëdarirun wuhñë fëna
do, wati nte tebirun viyë hun va mawërun gë
hnatah, kabi njëtërun kwëhnarun hnapul le
fecek do vëyëd kwëlëkwël.

³⁵ Awa, antë aravu itama hun ña: kwëhnak
buña sankaf.

³⁶ Iduñëna valëku d'anko alihahnu ile ñad
Wënu ña tac nuyadun ile ntehnëku ÿa.

³⁷ Ha, akerik hnë Vikerëh hna:
«Hnë wati ryoy,
ale yijëd ÿa ani nked, biyëdina.

³⁸ Ale satëk g'ikwëtahn nkod kwëlëkwël,
bare ge mbokak kamëhni, nëjëd'lohna g'umë.»[☆]

³⁹ Geylënëhna vële vokađ hamëhni do
vëvehñëde. Vële hwëtahnëk yeyihñëk, do
pehëtëd'enëhëfu.

11

Antiyëhn Ikwëtahn

¹ Ye ga ye ikwëtahn ña? Umë fëhnëtanëd
tamarun nuyadun ile hnapëdun ÿa,
tamahnërun paryi ile worun nudiluhna.

² Soñe ikwëtahn vacërakëlo va, Wënu ña
nësëk wapërën pañare lëw hni.

³ G'ikwëtahn ña, njëtinëk Wënu ña, gë wanës
wadëwu ña, ntik d'uniyë ÿi, aki vile hnuđen vi
w'atik hnë vile woyik nudëna.

⁴ G'ikwëtahn ña, Abel cënaka Wënu ña sadëha
fërën ile lëbëk va Kaÿe ÿa. Soñe rac, nuyak

[☆] **10:38 10:38:** Abakuk 2.3-4

ucedeya nte lehnëk acatëk, do Wënu ña nësëk wapërën pañare uyëd lëwü wã. G'ikwëtahn ña, Abel nkok nësënd lakënde gante cëmëk ki.✠

⁵ G'ikwëtahn ña, Enok nufik antë njët cëm iña do bokina nuyi, kabi Wënu ña nufëka; ani gë nufahnënda ÿa, nuÿako ucedeya Wënu ña nëñahnëka g'umë.✠

⁶ Do ahnë kodina nëñahna gë Wënu ña ge kwëhnana ikwëtahn. Ale fëñadëha Wënu ña tëfëka kwëtahn iÿin: Wënu ña nke do mbuñadëhëhni vële yëkëlehnëdëha va.

⁷ G'ikwëtahn ña, Nowe ntik sisikulu ÿa soñe pehëtahn tere lëwü ÿa. Ntakëkawo gë Wën ña ante njëtëndanëkawo ile woko nuyina ten ÿa. Koyëna Nowe tufahnëk duniÿa ÿa tëfëka mbëv do tac umë ye ale lëwëd usatah ule hnuÿadë soñe ikwëtahn.✠

⁸ G'ikwëtahn ña, Abëraham mawëhnëk imac iña do njik cape nkal nte rëfëka nuÿa had ntëw ña, do njiko hara yëtëna bi ne njid.

⁹ G'ikwëtahn ña, ñëwëko had ahneh hnë nkal nte ntehnëkawo Wën njëdadëha. Ntëdëniho hnë wasank, umë gë Isak gë Sakob, vëhni vële ntehnëko Wën njëdadëhëhni ile njëdadëha Abëraham ÿa.

¹⁰ Kabi Abëraham napëdëho nkol nte yëryik hn'ile njawëk d'us, nte njëryëk Wënu ña dënk had gante ñad ka.✠

✠ **11:4 11.4:** Wapëgwala 4.3-10 ✠ **11:5 11.5:** Wapëgwala 5.24

✠ **11:7 11.7:** Wapëgwala 6.13-22 ✠ **11:10 11.10:** Wapëgwala 12.1-5; 23.4; 35.12,27

11 G'ikwëtahn ña Abëraham g'asëvalu Sara mëkëniho nuñaniha fatah, mama ndëcahnëkëhniwo wabëhn ña do Sara mëkëna nag. Apacahnëkawo Wënu ña ntid' ile ntehnëkawo ÿa.✧

12 Aki pëgw asan aryampo fo, ale rëk tëkëk cëm iña, nagëhni kore wahnënk had wahol hnë ambin, ma had nkërëyal mbë tëfary wov.✧

13 Hnë ikwëtahn hna, acëmëni vëhni fop, hara vëhnuñana ile ntehnëkëhniwo Wënu ña njëdafëhëhni ÿa, bare nuni ñawët do natëkëhniwo, pëyahnëni vëhni dënk vëhneh do vëyas nkeni hnë d'uniña li.

14 Vële hnësëd koyëna va tufahnëni wapacëk nkal njëkëlehnadëni soje lëw hni.

15 Age rëkakëndëniho nahandëni hn'ile matiniho hna, nuñakëndëniho wati le mbokahnëdëni hnam.

16 Bare, nkal nte yak nëfak njëkëlehnëdëniho, nkal mbë g'ambin. Soje umë ye Wënu ña cëfëhnëlahna maci Wën hudëw hni; akëbënanëkëhni nkol.

17 G'ikwëtahn ña, Abëraham, këbënako njëdafhna aju Isak sadëha nte njëkëhnahnëkawo Wënu ña. Abëraham, ale ntehnëk Wën njëdaf iñë, këbënako njëdafhna aju ryamboli ÿa.

18 Soje lëwu ÿa ntehnëka Wënu ña: «Gë Isak nuñaduhëhni vutah vunte lehnëmi yëdafëmini va.»✧

✧ 11:11 11.11: Wapëgwala 18.11-14; 21.2 ✧ 11:12 11.12: Wapëgwala 22.17 ✧ 11:18 11.18: Wapëgwala 21.12

19 Bare nahadëho, lakënde aju cëm, Wënu ɲa məkëd mbëhnëndana; Wënu ɲa mbësaka aju ʒa, had ale vēhnik do rac ye dahëse ile yijëd ʒi.✧

20 G'ikwëtahn ɲa, Isak ndëwakëhni Sakob gë Esawu soɲe ile yijëd ʒa.✧

21 G'ikwëtahn ɲa, Sakob, nte ñadëho cëm ɲa, ndëwakëhni fop vutah Yosef va. Ryoko lëwu ʒa ñayëlahnëko do cëmba Wënu ɲa.✧

22 G'ikwëtahn ɲa, Yosef, ga pëɲako g'icëm, nësëko soɲe icahn bulunda Isërayel ʒa Esipët hna do nkabahn paɲare waʒëc walëwu wã.✧

23 G'ikwëtahn ɲa, rëmu gë hnëmu Moyis cowënihawo wadepera watar nte nagiko ɲa, kabi nuniho igwam fatah fa do dakëlëliwõhna gë sariya ahnaʒ a.✧

24 G'ikwëtahn ɲa, Moyis, ga nayëk, koʒahnëko antë nko macënde fatah aryagu Farawõ ʒa.

25 Atëhnako korotënti ndampo fo gë bulunda Wënu ɲa g'ile nkef hnë uhnatah wameh ile wok biʒëdina.✧

26 Nahadëho ge ñëwëk had Këris, rac fecek gë hnapul Esipët ʒa fop, kabi vinkër vidëwu va ile mbuñade ʒa fo nudëho.

27 G'ikwëtahn ɲa, kërënako Esipët hna hara dakëlana g'intavah ahnaʒ a do nko kahnënda had asan ale hnuðëha Wën hunte wok nudëna ʒa.

✧ **11:19 11.19:** Wapëgwala 22.1-10 ✧ **11:20 11.20:** Wapëgwala 27.27-29 ✧ **11:21 11.21:** Wapëgwala 27.39-40 ✧ **11:22 11.22:** Wapëgwala 50.24-25; Icahn 13.19 ✧ **11:23 11.23:** Icahn 2.1-2 ✧ **11:25 11.25:** Icahn 2.11-15

28 G'ikwëtahn ɲa, ntiyehñek Pak ŷa do cëlëven sat ŷa warënka vacery hna ðanko Avëvehn a antë ñakëhni vutah vucan vundënkweyënkwe vëva Isërayel va.✧

29 G'ikwëtahn ɲa, bulunda Isërayel ŷa ndanëtako wov vëntah ŷa had nkal kankah; vëvë Esipët va, nte njëbajëniho ɲa, kohnëkëhniwo wënka ɲa.✧

30 G'ikwëtahn ɲa, vëva Isërayel va nkwayaniho wafac mbëf gë wahi kece Seriko ŷa do njoko.✧

31 G'ikwëtahn ɲa, Rahab ale wafad a, cëmëntina gë vële wëyëhñekawo Wën va, kabi njotoyëhñekëhniwo yam fo vëyëkëtehna vëva Isërayel va.✧

32 Do ye hodëfu hnësu kat? Wati ŷa nkojëdëho soŋe hnësañnu woba Sedëwo gë Barak gë Samëson gë Sefëte gë David gë Samiyel do gë wakila wakaŋary.

33 G'ikwëtahn ɲa, vëhni mëkëni wahnawã wã, ntiyehñëni usatah, nuŷani ile ntehnëko Wënu ɲa ntid, ñabëni wawës wabësëhn,

34 ndipehñëni fanka hwëdëh fa, pehëni yëkan sëlame ŷa, kihñëniho bare njawëni, ntakëmaniho wët hna, ntanihëhni wasodafe waneh wã.

35 G'ikwëtahn ɲa, vësëval va mbësayinihëhni vësëm vëlëw hni va paß g'ibëhn ɲa. Vëryampo koroteyëhñiniho hafo cëm hna, aŋwëyëni pehët ɲa ðanko tükëntahnini hnë bëhn nte fecek hna.

✧ 11:28 11.28: Icahn 12.1-42 ✧ 11:29 11.29: Icahn 14.21-31

✧ 11:30 11.30: Yosuwe 6.1-20 ✧ 11:31 11.31: Yosuwe 2.1-23

³⁶ Vëryampo fëna mëkani waryas do idaf gë wus, vëyëntaŵ va ñabiniho do ntonjëni gë kaso.

³⁷ Andaŵini gë wëraka, acapini gë haha; acëmëni gë wataŵ wasëlame; njasarëdëniho cudatëni vacud wayand wape gë wahnankal, akaÿëhnëniho, koroteyehniniho, ntiyiniho këm fo;

³⁸ duniÿa ÿa tëfëlana iÿi sifa vahnë! An-jasarëdëniho gë wula do gë wahuŋ, hnë wakary do vankëd vambë nkal.

³⁹ Vëhni fop, mama nuÿani ucedeya përen soŋe ikwëtahn dëŵ hni ña, vëhnuÿana ile ntehniniho nuÿadëni ÿa.

⁴⁰ Kabi Wënu ña këbënanëkëfu ile ÿak fecek, tëfakilahna padëhnini hamehni fu.

12

Wënu ña Rëm fu ÿa

¹ Aki, kabi iÿi kore wasede wasankaf kwërënihefu, dihëtanëfu, fuhnë fëna, fop vile lënëk vi do wameh wante wëmaÿëhnëdëhefu njihahnin haryënkŵ ñi! Kamënanëfu nkaryin igary nte hwëtëhninëkëfu ña.

² Yëkëndënefuna Yesu, umë ale ye hayalin ikwëtahn ña do fadëneď rac. Nduñënak korot kërëwa hna hara yëkëna usëfëhnah soŋe uhnatah ule kwëtëhniko wã, do gaki, ntañak farëhw Wën hna.

³ Ha, naharyëndëna Yesu d'anko imbër ña g'icilëta ña antë mëku. Vëwën va ñewënihawo, bare nduñënak hnë fop.

⁴ Hnë imëтары hun wameh hna, cëvehnëluhna ten sat lëw̃ hun.

⁵ Ndënkwerun bi uhnira ule njëdaku Wënu ɲa had vutah vuntëw̃u:

«Ajë mën, age Ahwëhn a kwëdëki, kwëtëry hakili!

antë asilëta age curëdëhi!

⁶ Kabi Ahwëhn a kwëdëdëha ale ɲahnëk a, ndafëdëha ale njavëtëk had aju.»✧

⁷ Soɲe ahwëdahniwu tëfëka aryuñë nawu hnë wahorot hna. Wënu ɲa pabëdëhu had vijë. Nke bi ajë ale nkok kwëdëdina rëm ɲa?

⁸ Age kwëdëluhna had gante kwëdëni fop vutah vuntëw̃u va, vutah inca yerun gena vijë paryi.

⁹ Nuɲayinëkëhni warëm nkal li soɲe kwëdënihëfu, do ntëneninëkëhni. Tëfëlëfuhna bi maŵëhniëhna g'ahaŵary Rëm wayir w̃a nuɲahnin uwám w̃a?

¹⁰ Warëm fu soɲe wati kwëdënihëfu, gante nke vinahan vidëw̃ hni ka. Bare Wënu ɲa, soɲe uhnëfak lëw̃ fu ɲa, kwëdëdëhëfu danko nketahniëfu fuhnë fëna hnë ufacah lëw̃u hna.

¹¹ Paryi, wati nte kwëdëderu ɲa, nëɲëdëlihna, bare njiŵëhnëdëfu. Bare ge ndëcëk rac, vēle hnuɲad uwi sifa kwëda do lid gante tëfëka ka nuɲadëni usatah gë yam ɲa.

¹² Soɲe rac, njawëneriyin wëbák hun wante vērak ɲi do waho hun wale valëd w̃i!

¹³ «Soɲe wakwër hun ɲa, ndiriyin vankaw̃ vacatah,»✧ danko vēreyah va antë teyëni g'ahaŵary bare njërëni.

Uhnira vële wok vëhwëtahnäna

14 Yëkëlehnëryin ayewu yam gë vahnë va fop, do ayewu vëfacah; ufacah këm ahnä nudilahna Wënu ña.

15 Kwëtëryin hakili, ahnä antë tak ipërëna Wënu ña, antë pëhn nkahn gunkah nte waÿëmpaÿëhnëd bulunda ÿa gë wanto wadëwu ña.

16 Antë nkeni vële lid ndakëntal meh ma vële yafëk ile sëvak ÿa, had Esawu, umë ale, soñe hnëhët ryampo fo, wafëk carani ntëwu ña.

17 Njëterun d'us, ga ndëcëk rac, ante ñadëho nuÿa dëwara le rëfëkawo nuÿa vëhni rëmu hna, acañëtayiko. Nuÿalohna fere nkwëcëtahn ile ntiko ÿa, lakënde gante njëkëlehnëko gë wako ki.✧

18 Pëñaluhna kuñ nte hoðe ñaki had bulunda Isërayel. Nuni hnam, Kuñ Sinayi, hwëdëh hunte hëvëd, umëhwëry ucamah, viñar vëmëhwëryah, gë sël sankaf.

19 Nkwëryëni kopa lënk'w, do kopa wanës. Bulunda Isërayel le wëryëko iÿi kopa ÿa muntani antë mbok nësëhnëhni iÿi kopa.

20 Vëwëkana iÿi sariya: «Ale ÿakëk in'i kuñ, lakënde nke intaw, ndawëde gë wëraka.»✧

21 Ile hnuðeho ÿa ntaëmako hafo Moyis ntehn: «Antakëko do mbalëdëfu.»✧

22 Bare Kuñ Siÿo* ña fëñarun do gë nkol Wën hunte wok cëmëdina, Yerusalem mbë ambin gë mbara wawuli wamëleka wadëwu wale natëk.

✧ **12:17 12:17:** Wapëgwala 25.29-34; 27.30-40 ✧ **12:20 12:20:** Icahn 19.12-13 ✧ **12:21 12:21:** Divëta Sariya 9.19 * **12:22 12:22** Siÿo fakun ye Yerusalem hna hn'ile nke Cery Wën Cankaf hna.

²³ Pëņarun hn'ile mbarëpëlëni vutah Wën vële ryënkwik hnagik do herik wamac ambin hna. Pëņarunëha Wënu ņa, ale hitiņed̄ đuniņa yi fop. Pëņarunëhëhni wayir vahnë vësatah vële fadënik.

²⁴ Pëņarunëha Yesu, ale ye arëkëtelehni yëbëlan Wënu ņa gë fuhnë soņe cëbahn kwëtëla kasëk, do pëņarun sat le sëlëvik ãa nësëd̄ ile fecek g'iva Abel ãa✧.

²⁵ Kwëtëryin hakili soņe antë awëyũ ahnëpaŵuna ale hnësëd̄ a! Nirakëhniŵo bulunda Isërayel ãa, bare ņwëyëni vëhnëpadilahna, vëfehëlohna uhorot ule rëfëkëhni ŵa. Do fuhnë, pehëdelënehna g'ahaŵary ge niyahnihnëka ale hnirađëhëfu ambin hna.

²⁶ Kobëri ņa, kopa lëŵu ãa mbalehnëko nkal inji. Dol, ntehnëkëfu waņi: «Hwënta ryampo kat mbokëđëfu valehnu gena nkal inji fo bare ambin ņi fëna.»✧

²⁷ Waņi wanës «hwënta ryampo kat» fëhnëtanëk viyë vile ãahanik vi, hode mbalehni vi godina đanko nkohahn viyë vile wok kodena mbalehni vi.

²⁸ Koyëna, kabi nuŷaden inaŵ nte wok kodena mbalehni, camehnënefuna Wënu ņa do đokuņëhnënefuna gante nëņed̄ëha ka, g'untënah do g'untakah.

²⁹ Kabi Wën fu ha hwëđëh hunte vëvehned̄ ye.

13

Nkeya nte nëḡedëha Wën

¹ Goryin aḡahnëlu gë vëyënta hun va.

² Antë aryënkwu yotoyehn vëhneh va, kabi vëryampo, ge ntini rac, njotoyëhnënihëhni wamëleka ḡa hara vëyëtëna.

³ Dënkwëtaryinëhni vële sëdfik va, had wühne fëna cëdfaryirun gë vëhni, do gë vële horotëntëde va fëna, kabi wühne fëna, kwëhnarun mbahn.

⁴ Vahnë va fop tëfëkëhni ntënëni iñël ḡa do ipad vële yëlëlëk va fëna pac. Wënu ḡa kitijëdëhëhni vële lid ndakëntal meh gë vësan vëyëlah ma vësëval vëyëlik vële yëkëlehnëdëhëhni vëhaḡary.

⁵ Antë inahn koryi ḡa ndënkwary vanjasa hun va; natëryiḡu g'ile hwëhnarun ḡa, kabi Wënu ḡa ntehnëk umë dënk:

«Hali, tavëdila,
dënkwëdila!»✧

⁶ Soḡe umë ye kodën nësin gë tama:

«Ahwëhn a yijëd ndemaḡo, ñoñ dakëdiloḡna.

Ye kodëni ntiniho vahnë va?»✧

⁷ Dënkwëtaryinëhni vële yenëhnëkuno haryënkwa va, fëyakuno wanës Wënu ḡa. Naharyin gante nkeniḡo ka do vile wätik hnë uwám lëw hni hna do tëfëtalehnëryin ikwëtahn ntëw hni ḡa.

⁸ Yesu Këris arac fo ye yëhno gë dol, do nkod koyëna kantëm.

⁹ Antë aravu arokayiwu gë fop wasifa vakarëḡa vanëmpëlah. Njivëk vambery va

✧ 13:5 13:5: Yosuwe 1.5; Divëta Sariya 31.6,8 ✧ 13:6 13:6: Wahnëw 118.6

njaŵëninëfu g'ipërëna Wënu ɲa; bare sariya soɲe uryav ŵa ndemadilihna vēle rēfēdēha va.

¹⁰ Kwēhnaŷihñēk hn'ile cēnade sadēha, do vēsēna vēle ryokuɲēd sank hna tēfēlihna tokēni ile ŵatik hnam ŷa.

¹¹ Ani, asēna wasadēha asankaf yojēd sat wulaŵ hnē waŷēŵa wasēvah hna soɲe tavēhn wameh ɲa, do vimbahn wulaŵ warac pēdēde kamēhni ryaha hna.

¹² Soɲe rac ye Yesu fēna cēmēk kamēhni nkol hna, d'anko pacēnahn bulunda ŷa gē sat lēŵu ŷa dēnk.

¹³ Awa, cahnēnēfu pankēlin g'umē hamēhni ryaha hna, do dībēnēfu usēfēnahnah ryampo fo g'umē.

¹⁴ Kabi kwēhnayilēnēhna gēd ani nkol nte viŷēd kwēlēkwēl; nte yijēd ɲa yēkēlehnēden.

¹⁵ Paɓ gē Yesu, yēdanēfuna Wënu ɲa kwēlēkwēl icēmb had sadēha, umē fēhnētanēk wanēs vēle yavētēdēha g'Ahwēhn.

¹⁶ Antē aryēnkwu idi ufērēn ŵa gē cahēl ile hwēhnarun ŷa, wēli sadēha le hnēɲēdēha Wënu ɲa.

¹⁷ Maŵēhnēryinēhni vēvē haryēnkwa hun va do dēnēnēryinēhni. Njēkadēni vintaŵary hun nketēni vahnē vēle rēfēka tēfētanēniha Wënu ɲa doku lēŵ hni ŷa. Tac, age maŵēhnērunēhēhni, ntidēni doku lēŵ hni ŷa g'uhnatah, genēhnēdīlihna idīb, rac d'emadiluhna.

¹⁸ Yēfaryindēna Wënu ɲa soɲe fu. Apac-ahnēkēfu ñoñ kwēhnalēfuhna ile heŷandebun. Njēkēlehnēdēfun lifu fop g'afērēn.

19 Ile rëyëdëmu ntëbi ÿa ayëfaŵu d'anko yiju ñap ÿal hun.

Iyëfa gë simpaÿi

20 Wën hwëhn yam ÿa kayëndëka fagant vësëm hna Ahwëhn fu ÿa Yesu Këris, umë ale ye aheryëherya asankaf wape ña. Do sat sadëha lëŵu ÿa nuÿanëkéfu kwëtëla nte viÿëd' soñe kantëm.

21 Arabi unji Wën nti mëkin ntiyin fop ile fërënak d'anko padënin iña dëŵu ña! Arabi nti hnë fuhnë, paß gë Yesu Këris, ile hnëñëdëha ÿa! Cëmb inja nke gë Yesu Këris soñe kantëm! Amina!

22 Vëÿënta mën, tëyëdëmu, maŵeryin g'iduñëna wanji wanës wante hamënaÿëhnëd; yaßena.

23 Yëtëryin, aÿënta fu ÿa Timote tavik. Age njijek ñap, njiryidëfun gë ami ayëkijiwu.

24 Gaÿëryinëhni vëvë haryënkwa hun va gë vëfacah va fop. Vëyënta fu vëvë Itali va nkaÿënihu.

25 Arabi ipërëna Wënu ña nke gë wühnë fop!

Wamey
Wamey: Vikerëh Vikasëk Wën gë Wapëgwala (New Testament+)

copyright © 2018 Wycliffe Bible Translators, Inc.

Language: Wamey

Contributor: Wycliffe Bible Translators, Inc.

All rights reserved.

2025-04-30

PDF generated using Haiola and XeLaTeX on 30 Apr 2025 from source files dated 1 May 2025
f961026b-f72f-5bd7-9f75-efa7f932577e